



Frauenverein Zäziwil  
und Umgebung

## Jahresbericht 2021

Agfange hi mir üses nöiie Vereinsjahr ganz speziell, wie s ir Zyt vor Corona-Pandemie öbe üblich isch -nüt isch meh normau. So hi mir am 10.März 2021 d Ergebnis vo üser 56. aber erschte, schriftliche Houptversammlig, zäme mit de zwo Stimmezählerinne usgwärtet. Zum Glück hi mir so e grosse Stubetisch, d Stimm resp. Wahlbeteiligung isch nämlich sehr höch gsi. Danke öich aune vielmau fürs Mitmache u öies Interesse.

Wie gärn wäre de mir gli mit üsne nöiigwählte Vorstandsmitglieder Brigitte, Evelyn u Karin zäme cho. Aber statt aui a ei Tisch z hocke bi ig de ganz eleini mit Ungerlage u Handy, u scho fasch im Pyjama über Zoom, mit mine Vorstandskolleginne verbunge gsi.

Chli stolz si mir aber bis am Schluss aui, dass mir das mit der cheibe Technik doch no härebrunge hi, für zäme, voll Hoffnig üses nöii Vereinsjahr z plane.

Dr Maibummel hi mir hür wägem unsichere gwitterhafte Wätter müesse absäge.

Was im Gägesatz zu fährt het dörfe statffinge, isch üse Nationalfiirtag dr 1. Ougschte.

Da si mir churzfristig vor Gmeind Zäziwil agfragt worde um Ungerstützig ir Feschwirtschaft.

Leider bi ig grad die einzigi gsi zum Häufe. Mi hets aber düecht dass sig ganz e glungne Abe gsi, wenn me däicht was vorauem dr Gmeinspräsi unger absolut turbulänte Vorussetzige het uf d Bei gestellt u ds Beschte drus gmacht het.

Es absoluts Glück gha, hi mir mit üser Seniorereis am 7.September: Zwar bereits mit Maske bewaffnet, derfür no grad ohni Zertifikat si mir nacheme Abstächer i die wunderschön-glägne Chiuche Seedorf, de speter im Landgasthof Garmiswil uf dr Terrasse mit eme herrlich feine Menu verwöhnt worde. U das aues musikalisch umrahmt vo üsere Huusmusik. Glücklich über dä glungnig Tag sie mir aui zäme ume gsung u zwäg, z Zäziwil oder Mirchel usgstiege.

Die bereits verschobni Landesgarteschou ds Ueberlinge hi mir vorsichtshalber vom Juni i Herbst usegschobe . Am 15. September hi mir die eher wiiti Reis a Bodensee mit em Zwahlen-Car unger d Räder gnoh. Trotz Zertifikat u Maskepflicht hets glub aune bis tüüf i z Härz guet ta, dä Usflug. Sigs die schier ändlosi Bluemepracht am See entlang oder dr bluemegschmückt Rundgang dür das altehrwürdige Stedtli oder ganz eifach Gsellchaft unger enang, wo doch eifach so wichtig isch.

Leider isch es de mit Absäge vo de witere Anläss witergange. Wie mängisch ha ig schlaflos Nächte gha u däicht, düreführe vo dene Sache ire normale Zyt wär eifacher gsi, als abwäge, zuewarte, glüsle u lose was äch üsi Landesregierig de als nächschts usegiet, für de am Schluss z publiziere u luege dass aui ume vernäh was öbe wieder nid statt-fingt.

I glube grad i so ere spezielle Zyt isch d Wiehnachtsbscherig wo mir für d Gmeind Zäziwil usführe ganz wichtig. O wens mängisch nume bi paar Wort unger dr Hustür bliebe isch ,wo mir mit de Beschänkte hi chönne wächsle, isch d Früüd über die Geste vor Gmeind jedesmau gross u dankbar.

Trotz intensiver Suechi nachere Lösig für d Seniorewiehnacht, hi mir de o dä Anlass müesse lah suuse, nid z letscht o, will den bereits die haubi Schuel Mirchel isch ir Isolation gsi. Sie hätte üs doch hür ändlich wieder mau mit singe u musiziere dä Namitag wöue verschönere.

Vorsichtig mit Plane hi mir de aber glich spontan e Wintertag organisiert. Bi schönschem Winterwätter si mir mit Privatauto nach Marbach gfahre, uf d Marbachegg ueche gondel u dert afe mau es usgiebig Apéro gnosse . Speter sie mir über d Lochsite ache gäge Bumbach gwanderet u wills so gäbig gange isch u mir guet si drinne gsi ir Zyt, hi mir de üsi Tour er Emme nah bis i Kemmeribode o no grad unger d Füess gnoh. Ob sie äch chli hi Angscht gha ds Glaffer vo üs Froue nähm de e z höche Lärmpegu a? Me het üs nämlich im Separét ire heimelige aute Stube platziert, es isch aber o dert fein u gmüetlich gsi. Mit em Poschi zrugg uf Marbach, hi mir de no e Blitzhaut ir Kambly gmacht. He ja itz darf me dert o ändlich wieder schnouse.

Ds "zäme ässe" het zum Glück unger de jewiels gforderete Massnahme oder Bedingige dörfe stattfinge.

Oeppis nöiis hi mir i däm Vereinsjahr ir Brockestube igführet. Anlässlich vor schriftliche HV hei mir freiwilligi Hälferinne gsuecht u erfreulicherwies o gfunge. So chö mir itze d Brockestube im Monet zwümau offe ha. Als Dankeschön hi mir de ändi Vereinsjahr zäme im Bahnhöfli e Pizza gnosse.

Dr Holzbachofe isch afe ume chli meh iigführet worde als ds vordere Jahr u wird bereits ganz fliessig reserviert.

Zum vergangne Kursprogramm vernäht dir anschliessend grad meh vo üsne Kursverantwortliche Froue. A dere Stell aber scho e riese Dank a öich.D Pandemie het s plane u düreführe schier mängisch verunmügligt u dr Ufwand mit Schutzkonzept schriebe u anpasse isch riesig gsi.

So isch s für üs de o a üser online-Vorstandssitzig im Jänner, schwierig gsi d Hauptversammlig z plane. Drum si mir uf Nummer sicher gange u hei um ei Monet verschobe, so dass mir möglichscht dörfe zäme cho u im beschte Fall no öppis zäme ässe.

Für mi wird's die letschti HV als Präsidentin si. Nach 12 Jahr im Vorstand, dervo 10 Jahr als öii Präsidentin , mache ig gärn Platz für nöii Idee. Mit viel Früd u zuegäh o chli Stolz luege ig uf die vergangne Jahr zrugg. Mit öich liebe itzige u ehemalige Vorstandskolleginne u em Vertroue vo öich Mitglieder, hi mir doch paar Sache i Bewegig brunge.

O wenn ig viel z Nacht ha gstudiert u mis Notitzheft näb mim Bett mängi Site gfüllt het mit Idee u Gedanke, ischs für mi e lehrriichi u befriedni Zyt gsi.

Ig däiche da scho nume a mi Furz vom Holzbachofe, wo dir liebe Froue igwilliget heit oder a üses 50-Jahr Jubiläum ir „brätschvolle“ Turnhalle oder chli speter d Turnhalle-Wiedreröffnig wo mir de Vereine Gschirr hi gschäicht, das heisst zersch usegläse, abgholt oder lah liefere, abwäsche, iruume u itze viel Früd dranne ha wens brucht wird. Zwüsche hi mir o es Plätzli a de Gwärbusstellige oder mängisch a ganze Barfuesswäg übercho u gestaltet, oder de hi mir dr Muet gha d Generalverammliig vor ehemalige EvK dūrezführe. U d Flammchüeche ar Brächete wo de ire Nachtaktion doch no die grüne Schübe hi möge härecho, isch o scho es Kapitel für sich.

O die viele schöne Usflüg u Reise bi ig de aube afe im Schlaf dūregange. U meischtens ischs no besser use cho als im Troum.

Dir gseht mit eme lachende u eme grännende Oug gibe ig mis Aemtli witer u danke öich aune a dere Stell no mau für öiies Vertroue u öii Ungerstützig.

Die aueri gröschti Stützi ha ig aber u dere Zyt vo mire Familie brucht u übercho. I ha ihne übrigenens diversi Teilnahme a de Seniorereise zuegsicheret☺

Itz wünsche ig öich aune u üsem Froueverein vo Härze nume z Aueribeschte, vorab viel gueti Gsundheit.

Grad die letschte zwü Jahr hi zeigt, dass me d Hoffnig nie darf ufgäh u s umso wichtiger isch, dass mir dranne bliebe u üs haut apasse wie s de Sitution verlangt.

So nachem Motto;

Nach jedem stränge Winter chunnt garantiert e nöii Frühelig.

Uf witerhin viel gueti Begägnige mit öich verbliebe ig

Renate Nussbaum